

**Himpunan bantah kekejaman pada Rohingya esok  
MalaysiaKini.com  
9 Ogos, 2012**

Gabungan Mahasiswa Islam Se-Malaysia Islam (Gamis) menganjurkan Himpunan Keamanan Umat Islam Rohingya esok sebagai membantah kekejaman terhadap masyarakat tersebut.

"Hati umat Islam kembali luka, selepas isu kekejaman terhadap rakyat Syria, kini masyarakat Islam Rohingya menjadi mangsa kekejaman," kata Presiden Gamis, Akram Ikrami Taib Azamudden dalam satu kenyataan hari ini.

Perhimpunan tersebut akan diadakan di Dewan Kelab Sultan Sulaiman, Kampung Baru, Kuala Lumpur bermula jam 8.30 malam.

Akram berkata perhimpunan tersebut untuk menimbulkan kesedaran mengenai kezaliman yang dilakukan terhadap masyarakat Islam Rohingya.

"Yang lebih penting ialah memperkukuhkan solidariti dari pelbagai pihak sama ada akademik, politik, aktivis dan sebagainya," katanya dalam satu kenyataan hari ini

Menurutnya, perhimpunan tersebut akan disertai wakil kesatuan masyarakat Islam Rohingya; Setiausaha Majlis Perundingan Pertubuhan Islam Malaysia (Mapim), Mohd Azmi Abdul Hamid; Felo Kanan Institut Kajian Rantau Asia Barat (Ikrab), Prof. Madya Dr.Kamaruzzaman Yusoff ; Ahli Parlimen Lembah Pantai, Nurul Izzah Anwar, wakil Umno dan wakil mahasiswa.

"Gamis menyeru semua lapisan masyarakat untuk bersama-samadalam himpunan ini. Dan perlu dijelaskan bahawa isu Rohingya bukan sekadar isu umat Islam tapi melibatkan sensitiviti semua masyarakat atas nilai menuntut keadilan dan membasmi kezaliman," tegasnya.